Universal Declaration of Human Rights - Malay (Arabic)

© 1996 – 2009 The Office of the High Commissioner for Human Rights

This HTML version prepared by the UDHR in Unicode project, http://www.unicode.org/udhr.

ڤراشتھارن حق اساسی مأنسی سجاکت

مقدمه

بهاواساڻ ڤڠيعترافن کأوتوهن کموليأن دان حق سامرات سرتا اساسي يڠ تق ترڤيسه باڬي سلوروه اومت مأنسي عداله اساس کبيبسن، کعاديلن دان کداماين دنيا.

بهاواساث ڤغاباين سرتا ڤغهينأن ترهادڤ حق اساسي مأنسي تله ڤون مڠعاقبتكن تيندقن تركوتوق يڠ تله ملڠكْري ڤراسأن هاتي اومت مأنسي، دان مونچولڻ سبواه دنيا د مان مأنسي اكن منعمتي كبيبسن براوچڤ دان مڠانوت كڤرچايأن سرتا كبيبسن دري راستاكوت دان چيتاراس تله ڤون دأشتهاركن سباڬاي اسڤيراسي تراكوڠ سلوروه اومت مأنسي.

سكيران كيت تيدق ماهو مندوروڠ مأنسي دالم كأدأن تردسق، سباڬاي ڤيليهن تراخير، ممبرونتق ممنتڠ كظاليمن سرتا ڤنيندسن، مك عداله ڤنتيڠ باڬي حق اساسي مأنسي دڤرتاهنكن اوليه كدولتن اوندڠ٢.

بهاواسان عداله ڤنتيڠ باڬي مماجوكن ڤركمبڠن ڤرهوبوڠن ڤرصحابتن د انتارا نكارا٢.

بهاواسان رعيت بغسا۲ برساتو، دالم ڤياڬمن تله سكالي لاڬي منڬسكن كڤرچايأن مريك ترهادڤ حق اساسي مأنسي، ترهادڤ كموليأن سرتا نيلايديري مأنسي دان ترهادڤ حق سامرات للاكي دان ڤرمڤوان دان تله منتڤكن كعزمن اونتوق مماجوكن ڤركمبڠن سوسيال دان طرف هيدوڤ يڠ لبيه سمڤرنا دالم سواسان كبيبسن يڠ لبيه لواس.

بهاواسان نكارا۲ اڠڬوتا تله براقرار اونتوق ماسيڠ۲ منچاڤاي، دڠن كرجاسام بڠسا۲ برساتو، ڤڠوتارأن كحرمتن سجاڬت ترهادڤ، سرتا ڤماتوهن، حق اساسي مأنسي دان كبيبسن اساسى.

بهاواسان ساتو فهمن برسام ترهادڤ حق سرتا كبيبسن اين سلوروهن عداله ترڤنتيڠ دمي منجاديكن اقرار اين كثاتأن سڤنوهن.

مك دڠن اين

ڤرهيمڤونن اڬوڠ مڠيشتهاركن

قراشتهارن سجاکت حق اساسي مأنسي اين سباکاي سواتو اوکورن برسام ترهادڤ ڤنچاڤاين اوليه سلوروه اومت مأنسي دان کسموا نکارا دڠن توجوان سوڤاي ستياڤ اينديويدو دان ستياڤ بادن مشارکت، دڠن سننتياس مڠيڠتي ڤراشتهارن اين، هندقله برعزم ملالؤي ڤڠاجرن دان ڤنديديقن باکي مماجوکن سانجوڠن ترهادڤ سلوروه حق۲ دان کبيبسن اين دان سچارا لڠکه۲ برڤريڠکت ڤريڠکت، د بيدڠ نکارا دان انتارابڠسا، باکي منجامينکن ڤڠيعترافن دان ڤماتوهن سجاکتڻ يڠ برکسن، کدوا دواڻ د انتارا نکارا۲ اڠکوتا ماسيڠ۲ دان رعيت ولايه۲ د باوه بيدڠکواس مريك.

ڤركارا 1.

سموا مأنسي دلاهيركن بيبس دان سامرات دري سكي كموليأن دان حق٢. مريك ممڤوڻاي ڤميكيرن دان ڤراسأن هاتي دان هندقله برتيندق د انتارا ساتو سام لائن دڠن سماڠت ڤرساودارأن.

ڤركارا 2.

ستياڤ اورڠ عداله برحق كڤد سموا حق٢ دان كبيبسن يڠ ترمكتوب دالم ڤراشتهارن اين، تنڤا سبارڠ اڤ جوا ڤمبيذأن، سڤرتي بڠسا، ورنا كوليت، جنتينا، بهاس، اڬام، فهم ڤوليتيك اتاو لائن٢ فهمن، اصل اصول بڠسا كتورونن اتاو سوسيال هرتا بندا، كلاهيرن اتاو اڤ٢ طرف لائن.

ستروسش، تیاد سبارغ ڤمبیذأن بولیه دبوات براساسکن ڤادا طرف ڤولیتیك اتاو بیدڠکواس اتاوڤون انتارابڠسا سسبواه نکارا اتاو ولایه داتڠڽ سسأورڠ ایت، سام ایان مردیك، برامانه، تنڤا ڤمرینتهن سندیری اتاو براد د باوه اڤ۲ سکتن کدولتن لائنن.

ڤركارا 3.

ستياڤ اورڠ عداله برحق كڤد ڽاوا، كبيبسن دان كسلامتن ديري.

ڤركارا 4.

تياد سسياڤا ڤون بوليه دڤرهمبا اتاو دڤرعبديكن; كعبدين دان داڬڠن همبا عبدي هندقله دلارڠ دالم سموا بنتوقث.

ڤركارا 5.

تياد سسياڤا ڤون بوليه دكناكن سيقسأن اتاو لاينن اتاو حكومن يڠ ظاليم، تيدق برڤريكمأنسيأن اتاو مڠهيناكن.

ڤركارا 6.

ستياڤ اورڠ عداله برحق كڤد ڤڠيعترافن د مان جوا سباڬاي سأورڠ انسان د سيسي اوندڠ٢.

ڤركارا 7.

سموا اورڠ عداله سامرات د سيسي اوندڠ۲ دان برحق تنڤا اڤ۲ ڤمبيذأن كڤد ڤرليندوڠن يڠ سامرات د سيسي اوندڠ۲. سموا اورڠ عداله برحق كڤد ڤرليندوڠن يڠ سامرات درڨد سبارڠ ڤمبازأن يڠ ملڠڬر ڤراشتهارن اين دان درڨد سبارڠ هاسوتن ترهادڤ ڤمبيذأن سدمكين.

ڤركارا 8.

ستياڤ اورڠ عداله برحق كڤد ڤموليهن يڠ بركسن اوليه تريبونل٢ كبڠسأن يڠ كومڤيتين ترهادڤ تيندقن٢ يڠ ملڠڬر حق٢ اساسي يڠ دبريكنث اوليه ڤرلمباڬأن اتاو اوليه اوندڠ٢.

ڤركارا 9.

تياد سسياڤا ڤون بوليه دكناكن تڠكڤن، تاهنن اتاو ڤمبواڠن نڬري سڃارا سوينڠ وينڠڽ.

ڤركارا 10.

ستياڤ اورڠ عداله برحق دڠن سامرات سڤنوهڻ کڤد ڤمبيچارأن عاديل دان تربوك اوليه سواتو تريبونل بيبس دان سقسام، دالم ڤنتڤن حق٢ دان تڠڬوڠنڻ دان سبارڠ تودوهن جنايه ترهادڨث.

ڤركارا 11.

1. ستياڤ اورڠ يڠ دتودوه دڠن کسالهن کسکسأن عداله برحق دأڠڬڤ تيدق ساله سهيڠڬ دبوقتيکن ساله منوروت اوندڠ٢ د دالم ڤربيچارأن تربوك د مان دي تله دبريکن سکالا جامينن يڠ ڤرلو اونتوق ڤمبلأنث.

2. تياد سسياڤا ڤون بوليه دڤوتوسكن برساله اتس سبارڠ كسالهن كسكسأن اوليه كران سبارڠ تيندقن اتاو كتيڠڬلن يڠ تيدق مروڤاكن سواتو كسالهن كسكسأن، د سيسي اوندڠ۲ كبڠسأن اتاو انتارابڠسا، ڤادا ماس اياڻ دلاكوكن. تياد ڤولا بوليه دكناكن سبارڠ حكومن يڠ لبيه برت دري حكومن يڠ ترڤاكاي كتيك كسالهن كسكسأن ايت دلاكوكن.

ڤركارا 12.

تياد سسياڤا ڤون يڠ بوليه دكناكن كڤد سبارڠ كڠڬوان سوينڠ وينڠڨ ترهادڤ كأدأن ڤريبادي، كلوارڬ، رومهتڠڬ اتاو سورت مڽورتڽ، اتاو ڤرچروبوهن كأتس مرواه دان نام بائڨن. ستياڤ اورڠ برحق كڤد ڤرليندوڠن اوندڠ٢ ترهادڤ كڠڬوان اتاو ڤرچروبوهن سدمكين.

ڤركارا 13.

1. ستياڤ اورڠ عداله برحق كڤد كبيبسن برڬرق دان برمستوطين د دالم سمڤادن سسبواه نڬارا.

2. ستياڤ اورڠ برحق منيڠڬلكن مان٢ نڬارا، ترماسوق نڬاراڻ سنديري، دان كمبالي سمولا كنڬاراڻ.

ڤركارا 14.

1. ستياڤ اورڠ برحق مموهون دان منعمتي ڤرليندوڠن ڤوليتيك دالم نڬارا لائن درڤد سبارڠ انياي.

2. حق اين تيدق بوليه دتونتوت باڬي ڤندعوأن يڠ بنر٢ تيمبول درڤد كسالهن بوكن ڤوليتيك اتاو درڤد تيندقن يڠ برتنتڠن دڠن توجوان٢ دان ڤرينسيڤ٢ بڠسا٢ برساتو.

ڤركارا 15.

1. ستياڤ اورڠ عداله برحق كڤد سواتو كورڬانڬارأن.

2. تياد سسياڤا ڤون بوليه دلوچوتكن كوركانكارأنڻ سچارا سوينڠ وينڠث اتاو دنافيكن حق منوكر كوركانكارأنث.

ڤركارا 16.

- 1. للاكي دان ڤرمڤوان ديواس، تنڤا مڠيرا بڠسا، كوركانڬارأن اتاو اڬام، برحق بركهوين دان منوبوهكن كلوارك. مريك عداله برحق كڤد حق٢ سامرات برهوبوڠ دڠن ڨركهوينن، دالم تيمڤوه ماس ڨركهوينن دان ڨادا ڨمبوبرنڽ.
 - 2. ڤركھوينن ھاڻ بوليه دلقساناكن دڠن ڤرستوجوان بيبس دان سڤنوھڻ اوليه ڤيھق٢ يڠ برچادڠ اونتوق بركھوين.
 - 3. كلوارك عداله يونيت كومڤولن سمولاجادي دان اساسي دالم مشاركت دان عداله برحق كڤد ڤرليندوڠن اوليه مشاركت دان نڭارا.

ڤركارا 17.

- 1. ستياڤ اورڠ برحق مميليقي هرتا سچارا برسنديرين سرتا سچارا برکوڠسي دڠن اورڠ لائن.
 - 2. تياد سسياڤا ڤون بوليه دلوچوتكن هرتا بنداڻ سچارا سوينڠ وينڠڽ.

ڤركارا 18.

ستیاڤ اورڠ عداله برحق کڤد کبیبسن برفیکیر، ڤراسأن هاتي دان اڬام; حق این ترماسوقله کبیبسن منوکر اڬام اتاو کڤرچایأنڽ، دان کبیبسن، سمادا سچارا برسندیرین اتاو سچارا برسام سام دڠن اورڠ۲ لائن دان سچارا تربوك اتاو برسندیری، مڠانوتی اڬام اتاو کڤرچایأنڽ ملالؤی ڤڠاجرن، عملن، ڤموجأن دان ڤماتوهن.

ڤركارا 19.

ستیاڤ اورغ عداله برحق کڤد کبیبسن ڤنداڤت دان مڠلوارکن فیکیرن; حق این ترماسوقله کبیبسن ممکڠ ڤنداڤت تنڤا کڠکُوان دان منونتوت، منریما دان مثیبارکن معلومت دان بواه فیکیرن ملالؤی سبارڠ میدیا دان تنڤا مڠیرا سمڤادن.

ڤركارا 20.

- 1. ستياڤ اورڠ عداله برحق كڤد كبيبسن برهيمڤون سچارا امان دان منوبوهكن ڤرساتوان.
 - 2. تياد سسياڤا ڤون بوليه دڤقسا منجادي اهلي مان٢ ڤرتوبوهن.

ڤركارا 21.

- 1. ستياڤ اورڠ برحق مڠمبيل بهاڬين دالم كراجأن نڬاران، سچارا لڠسوڠ اتاو ملالؤي واكيل٢ يڠ دڤيليه دڠن بيبس.
 - 2. ستياڤ اورڠ عداله برحق كڤد ڤلواڠ سامرات كڤد ڤرخدمتن عوام دالم نڬاراڽ.
- 3. كماهوان رعيت هندقله منجادي اساس كويباوأن كراجأن; كماهوان اين هندقله دبوقتيكن ملالؤي ڤيليهنراي بركالا يڠ سجاتي يڠ مان هندقله دأداكن سچارا سجاكت دان سامرات دان هندقله دأداكن سچارا اوندى سوليت اتاو ملالؤى اچارا ڤڠوندين بيبس يڠ كتارا.

ڤركارا 22.

ستياڤ اورڠ، سباڬاي اڠڬوتا مشاركت، عداله برحق كڤد كسلامتن سوسيال دانس برحق منجاديكن سواتو كڽاتأن، ملالؤي اوسها نڬارا دان كرجاسام انتارا بڠسا دان منوروت اورڬانيساسى دان سومبر۲ دالم نڬارا ماسيڠ۲، حق۲ ايكونومى، سوسيال دان كبودايأن يڠ ترمستي باڬي كموليأنڽ دان ڨركمبڠن بيبس كڨريبادينڽ.

ڤركارا 23.

1. ستياڤ اورڠ عداله برحق كڤد ڤكرجأن، كڤد ڤميليهن ڤكرجأنڻ سچارا بيبس، كڤد كأدأن٢ ڤكرجأن يڠ عاديل دان برفائده باڬيڻ دان كڤد ڤرليندوڠن درڤد ڤڠڠڬُورن.

2. ستياڤ اورڠ، تنڤا سبارڠ ڤمبيذأن، عداله برحق كڤد ڤڠڬاجين يڠ سام باڬي كرجا يڠ سام.

3. ستياڤ اورڠ يڠ بكرجا عداله برحق كڤد ڤمبايرن سارأن يڠ عاديل دان برفائده باڬيڻ يڠ مان ممڤستيكن بوات ديري دان كلوارڬڻ سواتو كهيدوڨن سسواي دڠن كموليأن مأنسي، دان يڠ مان دتمبه، جك ڨرتو، اوليه چارا۲ ڨرليندوڠن سوسيال يڠ لائڽْ.

4. ستياڤ اورڠ برحق منوبوه دان منجادي اهلي كساتوان سكرجا باڬي ممڤرليندوڠي كڤنتيڠن كڤنتيڠنث.

ڤركارا 24.

ستياڤ اورڠ عداله برحق كڤد ريهات دان ماس لاڤڠ، ترماسوق باتسن مناسبه كأتس ماس بكرجا دان چوتى برڬاجي يڠ بركالا.

ڤركارا 25.

1. ستياڤ اورڠ عداله برحق كڤد سواتو طرف هيدوڤ يڠ ممادائ باڬي كصيحتن دان كباجيقن ديري دان كلوارڬڽ، ترماسوقله ماكنن، ڤاكاين، ڤرومهن دان ڤڠاوسن ڤراوبتن سرتا ڤرخدمتن سوسيال يڠ ڤرلو، دان برحق كڤد ڤرليندوڠن كتيك برلاكوڻ ڤڠڠڬورن، كساكيتن، كتيدقاوڤايأن، دڤرجندأن، كعزورن اتاو لائن٢ ككورڠن كهيدوڨن دالم كأدأن د لوار كاولنڽ.

2. ايبو دان انق عداله برحق کڤد جاڬأن سرتا بنتوان خاص. سموا کانق۲، سمادا دلاهيرکن د دالم ماهوڤون د لوار نکاح، هندقله منعمتي ڤرليندوڠن سوسيال يڠ سام.

ڤركارا 26.

1. ستياڤ اورڠ عداله برحق كڤد ڤلاجرن. ڤلاجرن هندقله دبريكن ڤرچوما، سكورڠ كورڠث ڤادا ڤريڠكت اول دان اساسث. ڤلاجرن ڤريڠكت اول هندقله دواجبكن. ڤلاجرن تيكنيكل سرتا ڤروفيسيونل هندقله دسدياكن اونتوق عموم دان ڤلاجرن تيڠڬي هندقله ممڤوڻاي اكسيس يڠ سامرات كڤد سموا اورڠ اتس داسر كبوليهن.

2. ڤلاجرن هندقله دتوجوكن كڤد ڤركمبڠن سڤنوهڻ كڤريبادين مأنسي دان كأره ممڤركوكوهكن لاڬي راس حرمت باڬي حق٢ دان كبيبسن اساسي مأنسي، لاڻ هندقله مموڤوق ڤرسفهمن، كصبرن دان ڤرصحابتن د كالڠن سموا نڬارا، بڠسا اتاو كومڤولن٢ اڬام، دان هندقله مماجوكن سڬالا كڬياتن بڠسا٢ برساتو دمي ممليهارا كأمانن.

3. ايبو باڤ ممڤوڻاي حق تردهولو اونتوق مميليه جنيس ڤلاجرن يڠ اکن دبريکن کڤد انق٢ مريك.

ڤركارا 27.

1. ستياڤ اورڠ برحق سچارا بيبس مڠمبيل بهاڬين دالم كڬياتن كبودايأن مشاركتڽ، منعمتي كسنين دان سام٢ مراسائ كماجوان سائنس دان فائده فائدهڽ.

2. ستياڤ اورڠ عداله برحق كڤد ڤرليندوڠن كڤنتيڠن٢ مورل دان كبندأن حاصيل دري سبارڠ ڤڠحاصيلن سائنس، كسوسسترأن اتاو كسنين يڠ مان اياڻ عداله ڤنڃيڤتاڻ.

ڤركارا 28.

ستياڤ اورڠ عداله برحق كڤد سواتو سوسونن سوسيال دان انتارابڠسا دالم مان حق٢ اساسي دان كبيبسن يڠ ترمكتوب دالم ڤراشتهارن اين بوليه دجاديكن كثاتأن سڤنوهث.

ڤركارا 29.

1. ستياڤ اورڠ ممڤوڽاي كواجيڤن ترهادڤ مشاركت هاڻ دالم مان ڤركمبڠن كڤريبادينڻ سچارا بيبس دان سلوروهڻ ترموڠكين.

2. دالم مڠعملكن حق۲ دان كبيبسنث، ستياڤ اورڠ ترتعلوق هاڻ كڤد باتسن۲ سڤرتي يڠ دتنتوكن اوليه اوندڠ۲ سماتا مات باڬي توجوان منجامين ڤڠيعترافن دان ڤڠحرمتن يڠ سڤاتوتڻ ترهادڤ حق۲ دان كبيبسن اورڠ لائن دان اونتوق مندكتي كڤرلوان۲ سڤاتوتڻ باڬي اخلاق، كتنترمن عوام دان كباجيقن عموم دالم سواتو مشاركت يڠ ديموكراتيك.

3. حق۲ دان كبيبسن اين تيدق بوليه سام سكالي دعملكن سچارا برتنتڠن دڠن توجوان۲ دان ڤرينسيڤ۲ بڠسا۲ برساتو.

ڤركارا 30.

تياد اف٢ جوا دالم ڤراشتهارن اين بوليه دتفسيركن سباكي سديا ترسيرت ممبريكن كڤد مان٢ نكارا، كومڤولن اتاو ڤرسأورڠن سبارڠ حق اونتوق مليبتكن ديري دالم اڤ٢ كڬياتن اتاو ملاكوكن اڤ٢ ڤربواتن دڠن توجوان مموسنهكن اڤ٢ حق دان كبيبسن يڠ ترمكتوب دالم ڤراشتهارن اين.